

LA CUNVIGNE

## Cjarte europeane dai dirits des lenghis minoritariis: ce fature metile in vore!

La ocasion par une riflessione su la dimension europeane di lenghis e dirits linguistics e je stade ufierte ai 6 e 7 di Jugn stâts de cunvigne internazional di studis dal titul *Vincj agns di Cjarte europeane des lenghis regionâls o minoritariis. Lenghis, dirits, citadinance: Friûl-Vignesie Julie, Italie, Europe, Mediterani.*

L'incuintri al è stât imaneât de bande dal Dipartiment di Sciencis Juridichis e de catedre Jean Monnet in Guvier e politichis de Union Europeane de Unîversitât dal Friûl cu la colaborazion direte de Region e cul jutori dal PRIN 2008 "La Union pal Mediterani: viers di un spazi economic integrât", coor-

denât de bande dal Ateneu furlan.

Dilunc des dôs zornadis, tra Palaç Antonini e il Palaç de Region, si è fat il pont de situazion in cont de Carte europeane, dai siei contignûts e di cemût che chesj a son stâts metûts in vore di chei Stâts che le àn ratificate e a son stât ignorâts di chei – par esempi il Stât talian e il Stât francès – che a àn fat una fature mostre a firmâ chê convenzion e no rivin a râtificare e plui in gjenerâl a dâ acet al fat che paritât di dirits e vûl di diversitât e pluralitât di lenghis e culturis. La situazion e je complicade ancje intal Stât spagnûl, soredut tal câs de comunitât asturiane, intant che altris esperiencis presentadis inte cunvigne a son stâts chei de Austrie, de Slovenie e de Cravuzie.

Par capî cemût che chê convenzion dal Consei de Europe e reste

un pont di riferiment pes minorancis e pe lôr tutele al merete ricuardât cemût che ancjemò tal 1995 il Consei regional dal Friûl-VJ, cuant che al veve fate buine la prime version di chê che e sarès diventade la Leç regional 15/1996, al veve reclamât la Carte intune maniere cussì "fuarte" che il Guvier statâl i veve fat cuntri e chel test, mendât, al tornâ a jessi fat bon culachi mès plui tart.

Il valôr de Cjarte nol salte fûr dome de dificolât dai Stâts tal râtificâle e tal metile in vore, ma ancje dal contest dulà che chel document al jere stât metût adun, ven a dî il procès di integrazion dal continent che in chei agns al cognosseve une fase di expansion, testemoneade ancje de aprovazion dal Tratat di Maastricht, che cun chel e nasevin la Union Europeane e la citadinance europeane.



Udin, palaç Antonini

Par frontâ i contignûts de Cjarte europeane vie pe cunvigne si à tignût cont ancje di chest contest e de prospettive, ancjemò valide in di di vuê, de "unitât inte diversitât", de pâs, de democrazie, de culture, dai dirits.

A son stâts doi dîs di confront a plui vòs e cuntun caratar multidisciplinâr. Studiôs e esperts che a lavorin sei inte region Friûl-

Vignesie Julie che in altrò tal Stât talian e in Europe (Sardegne, Salento, Trentin, Val di Aoste, Ream di Spagne, Stât francès, Slovenie; Cravuzie e Austrie) a àn vût fevelât de tutele des minorancis linguistics inte region Friûl-Vignesie Julie, in Italie, in Europe e tal spazi mediterani, cun riferiment sei ae normative che aes politichis ativas dedicadis ae promozion dal ûs des lenghis minoritariis tes scuelis, tai media, te societât e te produzion culturâl.

Al è saltât fûr cetant che al è fuart e positîf il rapuart jenfri lis istancis di garanzie dai dirits linguistics, la democrazie, la sostignibilitât sociâl, culturâl e economiche e il procès di integrazion dal continent. E cemût che o vin bisugne duç di plui lenghis, di plui dirits, di plui Europe e di mancul prejudizis fondâts su la idee, chê pardabon provincial e localiste, che insegnâ e doprâ plui lenghis, a tacâ di chês propriis di un certe comunitât teritoriâl, al è pierdi timp e straçâ risorsis.